

# Chiavenna (part 2) – en viadi tras las anteriuras

## Terras subditas da las Trais Lias

### Val Son Giachen

■ Val en la provinza taliana da Sunder situada tranter Clavenna ed il Pass dal Spleia, cun las vischnancas da San Filippo, Campodolcino ed Isolato (oz vischnanca da Madesimo). L'«Itinerarium Antonini» e la «Tabula Peutingeriana» dattan emprims renviaments a lieus en la val, tras ils quals passava il traffic da transit. La Val Son Giachen è vegnida cumpliada gia baud en la sfera d'interess da la Currezia. Il territori alpester da Rasdeggia sin la spunda dretga da la val è vegni utilisà en il 12avel tschientaner davent da Mesocco sur il Passo di Balniscio (2351 m). Il 1204 è vegni Clavenna en possess da fitanza da pastgiras sin l'Alp Emet. Il 1226 è vegnida construida ina via charrabla tranter Campodolcino e Madesimo. Cun quai èsi daventà pussaivel d'arivar en il Schons sur il Pass d'Emet (u Niemet) enstagl dal Pass dal Spleia. Al punct strategic Castelasc (1932 m), al nordost da Stuetta, sut l'odiern lai da sera da Monte Spluga, sa chattava enturn il 1260 la residenza dal chavalier Heinrich von Grüneck, in vasal da Walter IV da Vaz. En la Val Son Giachen hai dà numerusas faidas pervi da cunfins ed utilisaziuns dad alps. Il 1428 han conclus ils Libers da Schons e la gliעד da la Val Son Giachen in contract da pasch a Campodolcino.

En il temp medieval tardiv era la val in territori da passadi per campagnas militaras dals Grischuns vers il sid. A chaschun da l'occupaziun da la Vuclina tras ils Grischuns il 1512 èn vegnids concedids a la Val Son Giachen, tenor l'exempel milanais, privilegis cun ina vasta autonomia administrativa. La val furnava entaifer il sistem da transport a la ruta dal Spleia il sisavel port ch'aveva il duair da mantegnair la via ed il dretg d'incassar taxas da via per prestaziuns da construcziun spezialas. La susta sa chattava a Soste en vischinanza dad Isola. Il 1643 è vegnida renovada la via tras la chavorgia dal Cardinel ed enturn il 1709 è ella vegnida amplifigada tras Thomas Massner da Cuira. Ina perioda da bainstanzia relativa ha durà fin il 1800. Il 1797 ha la Val Son Giachen refusà da sa separar da la Republica da las Trais Lias. Pir la tenuta targlinanta dals Grischuns ha provocà l'annexiun da la val a la Republica cisalpina. En ils onns 1818–22 è vegnida construida ina via commerciala per il traffic cun chars e charrotschas da posta. Suenter l'avertura da la Viefier dal Gottard (1880) è il traffic da transit sa diminui e la val è s'impovrida. En il 20avel tschientaner han la construcziun d'ovras idraulicas ed in turissem moderà (a partir dals onns 1980) stgaffi novas pussaivladads da gudogn.



Monte Spluga al pe sid dal Pass dal Spleia. (Maletg da ca. 1820).



Campodolcino in la Val Son Giachen. (Maletg da ca. 1820).

Martin Bundi

### Campodolcino

Vischnanca taliana en la Val Son Giachen, provinza da Sunder, situada a 1071 m al sid dal Pass dal Spleia en vischinanza dal cunfin cun il Grischun. Lieu principal da la val. 1881 1961 abitants; 1961 1737; 2004 1078. Campodolcino consista da plirs vitgs ed acclauns che furman oz per part in'unitad: las culegnas da Prestone, Portarezza, Pietra, Tini e Corti en la val principala, la vischnanca da Fraciscio en la Val da la Rabbiosa, ils acclauns da Starleggia e Splughetta (u Porpiano) en la Val di Starleggia e Vho en la part meridiunala da la val. A Campodolcino sa chattava probablmain il Tarvesede roman, in lieu da susta a la via dal Spleia che serviva da staziun finala per chars e charrotschas e dal qual manavan trais vias al nord: ina lung il Liro ad Isola ed al Cardinel, in'otra a Pianazzo e Teggiate ed ina terza sur Fontana a Madesimo (Pass da Niemet) ed Andossi/Stuetta. Al nord da la baselgia parochiala maina ina marcanta punt artgada (proablmain dal 16avel tschientaner), numnada Ponte romano, sur la Rabbiosa. En il 15avel tschientaner ha Campodolcino remplazzà Son Giachen sco center politic da la val. Ils 21 da matg 1428 han ils Libers da Muntogna da Schons sutscrit a Portarezza

in contract da pasch cun la gliעד da la Val Son Giachen. Las assembleas da la vallada e dals terzals vegnivan convocadas dapi il 16avel tschientaner a Corti en vischinanza da la baselgia parochiala da S. Gion Battista. Causa si'impurtanza per il traffic da transit giudevan Campodolcino e l'entira val ina gronda autonomia administrativa ed han perquai vuli restar tar il Grischun il 1797. Il 1818–20 è vegnida construida, cun sustegn da l'Austria, la via charrabla tranter Campodolcino e Pianazzo/Teggiate; ils cranzes e las galarias imposantas da quest tschancun da via (architect: Carlo Donegani) servan per part anc oz al traffic d'autos.

Martin Bundi

### Madesimo

Vischnanca taliana da la provinza da Sunder, situada a 1534 m en la part sura da la Val Son Giachen, cun las fracziuns da Madesimo, Isola, Pianazzo e Montespluga. 1668 571 abitants; 2005 ca. 580. Il num Madesimo deriva probablmain dal latin amatissimus che signifitga [in lieu] fitg amabel. Il 1226 ha la vischnanca da Clavenna l'aschà construir ina via da sauma da Campodolcino sur Madesimo en la Val Niemet, al nord dal sparta-auas, nua che Clavenna aveva fittà alps. Questa via stretga per chars a duas rodas, che manava apparentmain sur Fontana, Piano del Lanzo e Scalcoggia, ha servi temporemain era a sviar la ruta dal Spleia cun continuaziun a Son Rocco per Teggiate e Stuetta. A partir dal 16avel tschientaner disponiva Madesimo d'in modest bogn termal. Tranter il 1888 ed il 1905 ha il poet talian Giosuè Carducci passentà regularmain vacanzas a Madesimo. L'agricultura e l'economia d'alp, secturs oriundmain dominants, èn sparids entant quasi dal tuttatfatg a favur dal turissem.

Martin Bundi

### Emet

Pass a 2295 m che maina da Madesimo (Val Son Giachen) a Calantgil (Val d'Avras). Il num Emet (era Diamat u Niemet) pudess star en connex cun las minieras. Attestà per l'emprima giada il 1204 sco alpe de Emede: in tschert Konrad da Masein aveva affittà l'Alp Emet en num dals Libers dal Rain Posterior per 30 onns a la vischnanca da Clavenna. En il temp medieval utilisav'ins per part il Pass d'Emet enstagl

dal Spleia per il traffic da martganzia e da muvel.

La Val d'Emet è vegnida cultivada durant tschientaners da gliעד dal sid. Il 1546 ha in Tonatz dad Andeer vendi la mesadad da l'Alp Mutalla en la Val d'Emet ad in vischin da Clavenna. Las relaziuns da possess han alura puspè midà. L'alp, situada sin territori da la vischnanca da Calantgil, vegn oz puspè utilisada da Grischuns.

Martin Bundi

### Isola (Val Son Giachen)

Vischnanca situada a 1260 m da la vart sid dal Pass dal Spleia a l'entrada en la Val Son Giachen taliana. Oasa da vastas pastgiras en in desert da crappa. Al sidvest da la vischnanca ed al nord da Vamlera s'extendeva en il temp autmedieval in gaud cumpact fin a passa 1900 m. En il 12avel tschientaner èn arrivads Mesolcinois sur il Passo di Baldiscio (2351 m) ad Isola ed han preni possess da quatter alps situadas a Rasdeggia al nord da la vischnanca tranter 1620 e 1900 m. Suenter dirs cumbats han ins fixà il 1203 contractualmain ils cunfins d'utilisaziun dals Mesolcinois: lung il Liro aval fin a la sbuccada dal Febbraro avant Isola, alura lung quest aul fin a la Cima di Baldiscio (2850 m). La part sura da la val è vegnida colonisada permanentmain pir en il 13avel tschientaner. Isola sa chattava a la Via Regia e ses abitants han adina vivì quasi exclusivmain dal traffic sur il Spleia. Da Clavenna via Isola manava antruras ina via da salaschada davos il Schneehorn vi sur l'Alp d'Areua a Novagnas e Medel e da là sur l'Alp Alvena a Stussavgia e sur il Pez Mezdi a Pitasch e Glion (ina traversada da var 16 uras e mez). Responsabel per il mantegniment da la via tras la chavorgia dal Cardinel al Spleia era il 6avel port a la Via Sur, numnadain quel da la Val Son Giachen, oravant tut da la vischnanca dad Isola. Oz na sa chatta Isola betg pli a la via dal pass.

Adolf Collenberg

### Cardinel

Chavorgia al sid dal Pass dal Spleia che nascha al mir occidental dal Lai dal Munt Spleia ad in'utezza da circa 1900 m sur mar. Orientà l'emprim vers il vest, fa il Cardinel a Soste (1544 m) in schanugl per cuntinuar alura vers il sid en direziun dad Isola (1280 m). La chavorgia ha ina differenza d'utezza da var 600 m. Ella ha difficultà onns a la lunga il passadi al traffic internaziunal

nordsid. Il num Cardinel deriva dal latin cardo, cardine e signifitga en rumantsch polesch, encalchen, sco toponim streglia, chavorgia, encarden. Probablmain utilisavan gia ils Romans la via dal Cardinel sper quellas sur Pianazzo u Madesimo. Il Cardinel vegniva frequentà sco ch'i para gia enturn il 1300, trais giadas n'ha el dentant betg pudì vegnir utilisà fin viaden il 17avel tschientaner. Durant il temp dal cronist Johannes Guler von Wyneck (1616) fachevan ins a medem temp diever dal Cardinel e da la via sur Madesimo. A la sortida dal Cardinel maina la via sur Soste, Rasdeggia (S. Agostino) e Mottalotta ad Isola. Il 1703 ha il terzal sura dad Isola, ch'aveva da mantegnair la via, pretendi da las Trais Lias in'amplicaziun da la via dal Cardinel. Il 1712 ha il speditur Thomas Massner da Cuira erigi per incumbensa da las Trais Lias in «neüwen weg durch den Cardinel, in St. Jacobs Thall». Questa via maina al vest da Stuetta ed a la riva sanestra dal Liro en ina pendenza regulara a Torni. Grazia a la pulvra da siglientar han ins pudì surmuntar ils spelms cun tunnels e galarias. Paracars, tschabargals da lain e tetgs da protecciun garantivan als berniers ina tscherta segirtad. Il traffic ha utilisà quest renumà tschancun da via durant bundant 100 onns. Il 1818–23 è vegnida construida la via commerciala, adattada al traffic da chars e charrotschas; quella manava tras insaquantas galarias e tunnels da Stuetta a Pianazzo per dumagnar en numerus carauns la spunda da Tschentsch/Cien a Campodolcino; questa via serva per part anc oz al traffic motorisà. In passadi istoric tras la chavorgia dal Cardinel è vegni renovà e fa part oz da la Via Spluga (ina senda culturala da Tusaun a Clavenna).

Martin Bundi

### Munt Spleia

Pitschen acclaun situà a 1908 m entadim la Val Son Giachen al pe sid dal Pass dal Spleia, fracziun da la vischnanca taliana d'Isolato, talian Monte Spluga. L'acclaun sa chatta a la fin d'ina anteriura planira auta, cuverta en il temp medieval per part da lareschs e tieus. Gia en il temp roman existiva qua probablmain ina susta, dapi il temp medieval tardiv è attestà in ospizi u in albiert. Sin il Munt Spleia è attestada in'ustaria ch'era averta enturn il 1600 durant l'entir onn. A la sava dal 18avel tschientaner è sa furmà, cun l'augment dal traffic, in vitget enturn la Ca della Montagna. En connex cun l'amplificaziun da la via tras il Cardinel è l'ospizi vegni engrondì, renovà e muni cun stallas ed in zain che sunava permanentmain en notgs da malaura. Cun la construcziun da la via commerciala (1823), d'ina baselgia e da la chasa da duana, ha Munt Spleia obtegni quasi l'aspect odiern. La gronda part da la planira da Munt Spleia è dapi il 1932 sfundrada en in lai artificial. Sin ina collina da la vart sid dal lai sa chattava en il temp medieval l'imposanta fortezza da Castelasc. Davent da quella controllavan e segiravan en il 13avel tschientaner vasals dals baruns de Vaz il traffic nord-sid.

Martin Bundi

## Lexicon Istoric Retic

Il LIR cumpligla bundant 3100 artgels (geografics, tematics, artgels da famiglias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.